

*Sa Turwing Miercoles o Sabado
Nakapaloob sa Misa*

**PALAGIANG
PAGNONOBENA
SA MAHAL NA
BIRHENG MAPAG-
AMPON**



MATAPOS ANG PANALANGIN PAGKAPAKINABANG

Pambungad na Panalangin

Tatlong panalangin ang maaaring pagpilian: Opsyon 1, Opsyon 2, at Opsyon 3

OPSYON 1

Lahat: (*nakatayo*)

O Birheng Kalinis-linisan, mairuging Ina ng mahal na Mananakop, at Tagapag-ampon sa mga Kristiyano, dahil sa iyo ay sumuko ang mga mapang-usig at sa lahat ng kakila-kilabot na pagsubok ay nagwagi kailanman ang Santa Iglesya. Dahil sa iyo, ang mga tao, ang mga angkan, ay nangatubos at nangaligtas sa di mabilang na kapahamakan, pagkat ang mga kaaway ay nagkahati-hati, lumayo ang mga maysakit at sampu ng kamatayan ay nagpapalugit kung tinatawagan ang iyong saklolo. Buhayin mong lalo at papagningasin ang aking pag-asa sa iyo, O Maria, upang sa lahat ng pangangailangan ay mapagkilalang tunay ngang ikaw ang tumutulong sa mga tumatawag sa iyo, ang nagtatanggol sa lahat ng pinag-uusig, ang nagbibigay ng lakas sa mga maysakit, aliw ng nalulumbay, takbuhan ng mga makasalanang at dahilan ng pananatili ng mga banal.

Isusunod rito ang **Panalangin Para sa Isang Pangangailangan sa Buhay sa ibaba ...**

OPSYON 2

Lahat: (*nakatayo*)

O Mariang Mapag-ampon, maibiging Esposa ng Espiritu Santo, Inang mahabagin at saklolo ng mga Kristiyano, naparito ako upang magmakaaawa na ako'y tulungan mo. Iligtas ako sa kasalanan, at sa lahat ng pakana ng mga kaaway ng aking kaluluwa at katawan, ilayo mo sa akin ang mga parusang tatanggapin ko, dahil sa mga sala kong nagawa at marapatin mong tumimo sa puso ang kabutihan ng iyong pagmamahal at ang iyong kapangyarihan. O Makapangyarihan kong Ina, gaano ang pagnanasa kong masdan ang iyong maningning na mukha sa walang kahulilip na ligayang tinamo mo doon sa Paraiso. Subali't isang sukab na pag-iisip ang nagsasabi sa aking hindi ako nararapat, dahil sa aking mga kasalanan, upang matamo ko ang iyong kaligayahan. Huwag mong ipahintulot ang ganoong kalaking kasawian, katamis-tamisan kong Ina. Ipanalangin mo ako, ihingi mo ako sa irog mong anak sa si Jesus ng ganap na pagsisisi sa aking mga sala, at ang biyaya na makagawa ng mabuting pangungumpisal at nang mabuhay ako sa katahimikan sa tanang buhay ko, at sa huli'y pumanaw sa

isang banal na kamatayan, tuloy makapisan mo at ng Diyos sa langit sa walang hanggang kaligayahan.

OPSYON 3

Lahat: (*nakatayo*)

O Mariang Mapag-ampon, anak na tunay ng Amang Kamahal-mahalan, ikaw ang itinalaga ng Diyos upang maging saklolo at tagapag-ampon sa mga Kristiyano sa lahat ng kanilang pangangailangan. Dahil dito'y sa iyo lumalapit nang walang humpay ang mga maysakit, ang mga dukha sa kanilang kagipitan, ang mga nagdadalamhati sa kanilang kapighatian, ang mga naglalayag sa karagatan, ang mga hukbo sa gitna ng digmaan, ang mga naglalakbay sa kapanganiban, ang mga naghihingalo sa kinatatakutang sandali ng kamatayan, at silang lahat ay nagkapalad magtamo sa iyo ng tulong, lakas at kaginhawahan. Kung gayon ay tanggapin mo, kung magiging karapat-dapat ang aking mga pagma-makaawa, O Inang mahabagin at sa aking pagsilong sa iyong pagkukop ay tulungan mo ako tuwina at alalayan sa lahat ng panganib. Iligtas mo ako sa lahat ng masama, at tuloy ipamagitan ako sa Panginoon upang makamtan ko ang biyayang kailangan, lalo na sa aking pagpanaw dito sa lupa at sa kabilang buhay.

Panalangin sa Isang Pangangailangan sa Buhay (nakaluhod)

Lahat:

Inang Mapagmahal, nangangailangan ako ng isang tanging biyaya, at sa pag-asa ko sa iyong kabutihan, ay nagsasakdal ako sa iyo, dakilang Mapag-ampon sa mga Kristiyano. Buong kababaang-loob na ako'y nakaluhod sa iyong harapan at isinasamo ko nang taos sa aking puso na iyong lunasan ang aking kailangan (*ipahayag nang lihim ang biyayang ibig makamtan*). Nababatid ko, mahal kong Ina, na ako'y hindi nararapat bigyan ng anuman, at ang ikinatatakot ko'y baka ang mga sala ko'y siyang nakapipigil sa iyong kabutihan. Subali't batid kong magagawa mo rin, Katamis-tamisang Ina, na ako'y hanguin sa nakahahabag na kalagayang ito, at gawing ako'y maglingkod sa iyo nang tapat, at sa iyong bugtong na Anak, upang makamtan ang kahanga-hangang biyaya ng iyong pag-aampon.

Aba Ginoong Maria ...

Maria, Mapag-ampon sa mga Kristiyano, ipanalangin mo kami! (3x)

Pangwakas na Panalangin

Pari: (*magsitayo ang lahat*)

O Diyos at Ama ng tanan, magiliw mong dinggin ang mga kahilingan aming ipinaaabot sa pamamagitan ni Santa Maria Mapag-ampon sa mga Kristiyano. Nawa'y buong kaluguran Mong ipagkaloob sa amin ang iyong biyaya kung ito ay naaayon sa Iyong banal na kalooban, sa ikaliligtas ng aming kaluluwa at sa ikapapanuto ng aming buhay dito sa lupang bayang kahapis-hapis. Hinihiling namin ito sa ngalan ni Jesucristong Anak Mo, nabubuhay at naghaharing kasama Mo at ng Espiritu Santo, magpasawalang hanggan. Amen.

Isusunod rito ang Pagbabasbas ng Pari at Pagwawakas ng Misa